

April
2018



Vol. IX No. 2

KRISTIAN THALAI

Kristian Thalai Pawl Chanchinbu thla tin chhuak

Khawvel
mamawh
Isua
Krista



Kum 2016 - 2018 CKTP hruiatute



Kum 2018 - 2020 CKTP hruiatute



Mizoram Synod Choir 2016-2018



57th KTP General Conference Organizing Committee



General Conference-a Hospitality Sub-Committee leh foreign atanga lo kalte

Kristian Ṭhalai Pawl chanchinbu thla tin chhuak**1970-a chhuah ṭan ■ Kum 41-naa vawi 4-na ■ Chhuah tawh zat : 473****Editor :**

Lalchhuanliana

Joint Editors :

Lalhnehzova

Lalfamkimi

Lalmuanawma

Dr. David C. Vanlalfakawma

Manager:

Lalmuanpuia

A lak man :

Kum khatah - Rs. 80.00

Copy khat - Rs. 7.00

*Thu chhuah tūr nei chuan Editor,
Kristian Ṭhalai, Synod Office-ah thawn
tūr a ni a; a la duh chuan KṬP Office-ah a
man pēk lāwk a ngai.*

Office Phone : 9436142398**E-Mail :*****kristianthalai1970@gmail.com******centralktp@gmail.com*****KRISTIAN ṬHALAI PAWL****Thupui**

Rawngbawl tūra chhandam

Thupui innghahna

Ephesi 2:10. Thil ṭha ti atán
Krista Isuaah chuan siama awmin,
ama kutchhuak kan ni si a, chu thil
ṭha tih chu kan awmna tūrin
Pathianin a buatsaih lāwk a ni.

Thiltumte

1. Isua Krista rinna leh amah anna
kawnga ṭhalaite hruai.
2. Kohhran kutke ni tura ṭhalaite
buatsaih.
3. Kohhran hnathawh tihpuitlin.
4. Krista Chanchin Ṭha puan
darh.

A CHHUNGA THU AWM

1. Editorial	2
2. Beiseina nung	3
3. 57th KṬP General Conference	7
4. Lalpa, min hriatpui tiraw	11
5. Ka Conference ve a...	13
6. Peshawar Tlangval	17
7. Ruih theih thil ṭhat lohzia	21
8. <i>Hruaitute Chanchin : Rochungnunga</i>	23
9. <i>SUNNA : Timothy Lalrindika</i>	25
10. <i>Hringlang tlâng : Bob-a duhthusam hnuhnung</i>	27
11. <i>Kantu : Tlangnuam West Branch</i>	29
12. Keimahni	31



GENERAL CONFERENCE KHA

Pathian awmpuina leh kaihhruaina duhawm tak changin KṚP General Coference vawi 57-na chu tuang takin kan lo hmang zo ta a, kawng hrang hranga kan inbuatsaihna hlawhtlin dan leh kan hmasawwnna tam tak hmuh khan thlnung a tilawm a ni.

Kan conference-ah khan thil chhinchhiah tlak tak tak hmuh tur a awm a, chanvo hrang hrang changtuten an tlinin an mawhpurhna an hlen ṭha hle bawk. Thupui leh a sawitu ṭha tak kan neih te khan conference a tihlu a, thlengtu inbuatsaihna chuan palai tin min tilawm a, kohhran hmasate huna ringtute nun dan leh an induhsakna a takin kan tawng leh a ni ber mai. Palai kalte chhiat tawh thu leh thihna hial thleng khan rilru erawh a tikhingbai hle thung.

KṚP-ten kan phak tawka rawngbawh hna kan thawhna tur kan relte bawhzui turin, kum 2018-2020 chhung hruaitu tur mi ṭha tak tak kan thlang chhuak a, KṚP member zawng zawng min tipumkhata, kan thupui tihhlawhtlinna kawnga min kaihruaitu ṭha tak an nih theih nan Pathian hnenah i ṭawngṭaipui mawlh mawlh ang u.

Kan chin ṭhan chhunzawm zel tlak tam tak a awm lain, chhunzawm chakawm loh pawh kan hmu tho awm e. Ringtu nun kan zawh mekah hian duhthlanna fel tak neia, kharwi hmunah pawh Isua chhinchhiahna pu zel turin member zawng zawng kan inbeisei a. Pathian zarah kan dam ang a, Serchhipah Pathian fak turin kan inhmu khawm leh dawm nia.

Conference hlim tak leh hlawk taka kan hman zawh mek lai hian, Kristian Ṭhalai chanchinbu pawhin enkawltu thar a lo nei dawm ta a. Tuna enkawltute hian tihsual leh tlin tawk lohna tam tak kan nei tih kan hria a, ngaihdam kan dil nghal a ni. Rorelnaa kan sawi angin, enkawltu tharte kutah Kristian Ṭhalai chanchinbu hian hma a sawn ngei ang tih kan ring a, an tha tichak turin kan phak tawkah ṭan la ṭheuh ila, thuziak rawngbawhna duhawm leh hlawk tak an neih theih nan duhsakna kan hlan bawk a ni.

BEISEINA NUNG 1 Petera 1:3-9

— Rinfela Zadeng
ATC, Durtlang
(Zobawk Vengthlang Branch)

A chung a kan tar lan Bible châng inngahna hi Petera te hun laia Asia Minor-a kohhran thang chak em em mai te chungchang lehkha a thawn aţangin a ni a. He lai bung 1:3-9-ah hian Pathian khawngaihna in Lal Isua thiha thawhleha hian beiseina nung min neihtir thu leh, chu Lal Isua thiha thawhleha chu kan chhandamna – chatuan nunna kan neih theihna tur a nih thu Petera hian min hrilh a. Beiseina hi keini ringtute chauh ni lo, mi zawng zawng hian kan neih hi a pawimawh em em a. Beiseina hi mi retheite chaw an ti hial thîn a ni.

Miin beiseina a neih tawh loh chuan nun hlutna hi a hre tawh thîn lo va. Mi lar, zai thiam, celeb., etc. pawh ni se, amahah beiseina a awm loh chuan mahni inti hlum hial a thlang mai thîn. Nikum lawk ah Linkin Park band-a an vocalist Chester Bennington-a pawh inawk hluma an hmuh

kha! Khang te kha a larin, khawvelin a hriat nen, beiseina a neih tawh loh vang a ni ngei ang, a nunna kha amahin a inlak hial ni! Chuvangin, beiseina neih pawimawhia hi kan sawi uar tawh thei lo vang a. Ringtute hian beiseina neih a pawimawhia leh Lal Isuaah beiseina nung nei tur kan nihzia sawi kan tum dawn a ni.

Eng vangin nge kan beidawn thîn?

Beiseina kan sawi rualin, kan beidawn fona chhan hi sawi ta ila. Kan beidawn thînna chhan hi tam tak a awm ang. Kan eizawna fuh loh vang te, kan hriselna thât loh vang te, kan hna, nupui pasal, nulat tlangvalna, sex, zirlaia fail vang, ruihhlo, AIDS, etc. vang tein kan nun hi a beidawng thîn. Kan beidawna chhan hrang hrang chu inang lo mah se, kan beidawng thîn a. Beidawna in a ken tel paw

em em chu – mahni intihhlum hi a ni. Chu chu Setana duh zawng tihfamkimna, sawi buai tur awm hauh lova hremhmun tlakna a ni. Beidawwna hi Setana'n hremhmuna min hruai luhna kawng awlsam ber – mahni intihhlumna a ni, ti ila kan sawi soal lo vang.

Beidawwna chu engtin nge kan hneh ang?

Kan nun beidawwna chhan chi hrang hrang a awm thu kan sawi tawh a. Min tibeidawngtu chu mi tinah a inang lo vang. Mahse, a hneh theih dan kawng chiang em em pakhat, beidawwna hnehna kawng dik leh innghahna tlak chu Lal Isuaah a ni. Kristiante chu kan beiseina hi Pathianah a innghat tlat a. Chu kan beiseina chuan kan inchhirna te, kan beisei loh thil lo thleng te pawh a hmachhawn dan kan thiam phah thin.

Beiseina neih tlat chu eng nge a tulna, a hlutna leh a tangkaina te eng nge?

Beiseina chuan kan rinna a tipung. Beiseina chu rinna chaw a ni a, chuti ang bawkin rinna pawh beiseina chaw a

ni. Hebrai lekhathawn bung 11-ah chiang takin kan hmu a. Rinna tel lovin beiseina sang tak kan nei thei lo va. Beiseina tel lo rinna chu a ke a bai kan ti thei ang. Ringtu tha ber berte hi khawvela beiseina nei sang ber berte an ni. Chuvangin, kan beiseina hi kan rinna nen a inzawm tlat a, KTP/TKP/SAY/PYD, etc. member beidawng hma, beidawwnain a hneh thin kan nih chuan kan rinnaah kan chak lo tihna a ni. Chuvangin, Lal Isua kan rinna, Pathian kan rinnaah pawh beiseina hi a beidawnthlak lai ber pawhin kan nei tur a ni.

Beiseina chuan mi dangte tan beiseina a siamsak thin

Beiseina hi darh zel thei a ni a, lungawi lo leh ngui taka kan awm changa mi dang kan tihngui/nguai phah thin ang bawkin, beiseina nung kan neih tlat hian mi dangah beiseina leh phurna a thlen ve thei a ni. Kristian chau tawhte kan tihphur mai bakah lungngaia kun reng te, phurrit tak phur mek te leh ringlomite pawhin eng vanga beiseina nung nei tlat nge kan nih an hriat duh phah hial thei.

Chuvangin, missionary-te tan phei chuan beiseina neih a pawimawh hle ang.

Tin, kohhran thalai hruaitu chinte phei chuan, kan member chaute tan pawha beiseina petu tur kan nih avangin beiseina hi kan neih a ngai a ni. Chu Lal Isuaa kan beiseina nung neih tlat a tang chuan nun chau leh beidawng mekte chu Lal Isuaa Beiseina Nung nei turin kan hruai thei ang.

Beiseina hi invenhimna a ni

Paula khan beiseina kha invenhimna lukhum (helmet) angin a lo sawi a, indona a tawp hma chu phelh loh turin. Kan rilru leh ngaih-tuahna awmna, kan lu (head) hmang hian Setana'n hna a thawk a, rinhllehna leh beidawwna, lungchhiatna leh rinhllehna te, etc. arawn tuh thin. Chu vang chuan kan rilru hi ni tinin beiseina – Pathian thu chu lua khum tlatin beidawwna leh سوالين min thlemna laka invenhimna atan kan hmang tur a ni.

Beiseina hi tihdamna a ni

Tunlaih depression nei tunlaih an tamzia kan hria

a. Heti ang counselling kan peka kan tum ber thin chu beiseina peka ni. Depression hi a awmzia ber chu beidawwna, beisei tur tlakchhamna a ni tih kan hria. Eng mah hi a tha thei tawh dawn lo niin an ngai thin. Chu vang chuan an hma lam hunah beisei tur a awm tih hriattir kan tum thin.

Heng an harsatna tawh mekte hi soal chhuah dan kawng a awm a, tih theih an nei tih hrattir hi kan tum tlat thin a nih kha. Chu beiseina chu mi tam takin an dampui a, chu beiseina hmang chuan kan thalaipui nun beidawngte hi kan chhanchhuakin, Lal Isua hnenah kan hruai thleng tur a ni.

Beiseina hi a taka tih chia ni

Beiseina hi eng mah ti lova thil ropui leh tha nghah chhuah tawp a ni lo. Beiseina chuan thiltih a keng tel a. Kohhran tana thil tha kan beisei chuan kohhran tan hna kan thawk thin. Kan fate, kan thiante an pianthar kan duh chuan Pathian thu kan hrilh thin. Beiseina chuan thiltih a hring thin.

Beiseinain min tithianghlim

Eng harsatna pawh he khawvelah hian tuar mah ila, Pathian faa vuah mai ni lo, a fapa ang tak tak kan nih hun hi a la thleng dawn. Chu chu ringtu hmasa leh Tirkhohte khan a tawp thlenga thianghlimna kawnga chhel taka an tawrhna chhan kha a ni. Chuvangin, kan سوالنا leh kan tawrhate chu beiseina chuan min tithianghlim thei a ni.

Beiseina chuan buaina karah pawh mi a tinghet

Rom-ho hun laia Kristiante bihrukna puk, Catacomb-ah khan lawng tihdinna (Thirchakai) lem zia 66 a awm an ti. Khang hun lai ringtute tihduhdahna boruak sosang tak karah khan beiseina kha an thirchakai, anmahni tiding nghettu a ni thin. Beiseina chuan mitin a hmuh theih loh thilah min vuan tang thin. Rinna thir hruin beiseina kan thlak a, Pathian thutiam lungpui

nghetah min ham tang thin a ni.

Beiseina chuan tun hunah hian kan tha a titho va, kan naktuk, chatuan ram chu eng taka min hmuhtir avangin. Beiseina chuan thim ata eng min pe a. Thil hrehawm leh hun thim a awm lo tia min hrilh lovin, chung hunah chuan eng a awm tih leh, thim tawpah khawvar a awm tih min hrilh zawk thin.

Beiseina pawimawhzia leh ringtute tana kan neih tur a nihzia hi kan sawi uar tawk zo lo vang. Heng kan tar lan atang hian beiseina hlutzia leh kan rinna kawngah pawh kan mamawh tak a nihzia kan hre awm e. Chuvangin, Lal Isua ringtute hian harsatna leh beidawanna, thihna karah pawh Beiseina Nung – Lal Isuaah i nei tlat ang u. Chu chu vanram kan thlenna tur kawnga min tanpuitu hlu tak a ni si a.



Thil a kal chak lutuk lohna turin upate zai kan zui a ngai a, a kal muan lutuk lohna turin thalaiten tha an thawh a ngai bawk thin. Thalaiten hian mei an nei a, upate'n eng an nei thung a, kan mamawh ve ve a ni.

- The Vance Havner Quote Book

57th KṚP General Conference West Phailengin hneh takin a thleng

— F. Lalremruata
Committee Member

Zoram chhunga thalaite intawh khawmna lian leh ngaihven hlawh ber KṚP General Conference vawi 57-na chu March 1-4, 2018 chhung khan West Phaileng GSA Playground-ah hman zawh a ni ta. KṚP member ni chunga Conference ka hmanna hnuhnung ber a lo ni ta reng mai. Lunglen thu lam chu dah thaila, kan hun hman ho dan i'n thlir let thuak thuak teh ang.

Min thlengtu lam

Conference boruak awm hma daih aṅang khan Central KṚP Committee chuan inkhawmpui atan hian subcommittee hrang hrang siamin, Phaileng lam nen thawh ho dan tur ruahmanna fel tak a lo siamin tawh a. Chumi kal zelah chuan W. Phaileng khaw chhunga kohhran pawl hrang hrang leh NGO intel khawm chuan Organizing Committee

member 72 awmna chu dinin, anni hmalakna hian subcommittee pawh 15 lai din a ni bawh. Budget atan cheng nuai sawmsarih (70 lakhs) ruahman a ni.

Titi lengvak aṅanga kan hriat danin, "An thleng zo tak tak dawn em ni? An khua a te si, ngaihtuah that leh a tha lo maw?" tih leh huphurhpuina aw a ri tam hle. Hetih lai hian anmahni lam aṅangin huphurhna thawm erawh hriat tur a awm lo thung. Pathian programme a ni tih an hriat chian em avangin an inbuatsaihna chuan saipui kal lai ang maiin chawlh a tum lo, hma lam panin a kal ngut ngut lawi si. Vanduaithlak takin pandalan peih tep tihin zan khat thil thu-ah a chim chhe ta rup mai. Mahse, a hma ai mahin an tum a ruh zawk em maw tih turin, ni rei lo te chhungin a thar a ding leh thei tlat. Heng aṅang hian an thawh hona thatzia a

lang Chiang Hle. Ningani zan a lo thlen meuh chuan Phailengin Gen. Conference a thleng ta tak tak tih hai rual lohvin kan hmu ta. Khaw dang, Gen. Conference lo thleng tawhte angin ennawm leh mi hip tur thil hmuh chakawm an nei lem lo; mahse, an mi sawmna angin "Phailengah Pathian i fak ho ang u," tih chu a takin a thleng Chiang Hle. Chhung tin deuhthawin vawk leh ar, conference pualin an vulh a, in leh lo bakah an khaw chhung hmuh theihin a thang. Palai riak lut in-report 21,456, lehlanga kal 5,804 an ni.

Report lam ve thung

Kum dang ang bawkin report kan theh luh tlai thin avangin hmalatute tan inbuat-saihna hun a chep a, hnu a phuai duh thin. Report dik leh felfai kan neih theih nan bial leh branch secretary theuhten tan lak kan ngai. Ram pum huapah Bial 201 leh Branch 860 awmin member 1,47,665 kan awm mek. Kristian Thalai chanchinbu chhut zat copy sangthum chuanga kan tlahniam hi tan kan lakna tur pawimawh tak a ni. Biak in aia hmun danga innei

kan la tam zawk zel avanghian inngaihzaun leh inkawm thuhlaah kan fimkhur deuh deuh a thil hle mai. Kohhrana kan sum chhun luh a pung zel hi thil lawmawm tak a ni bawk. Sum thawh chhuah a pun zel laiin inkhawm zat percentage a tlahniam ve zel erawh a inhmeh lo hle.

Rorel inkhawm

Chhim Veng Kohhran Biak Inah rorel inkhawm neih a ni a, palai 1,042-ten taima takin ro an rel. Kum 2018-2019 kumpuan thupui atan 'Kristian nun - takna' (Sam 51:6) thlangin, tunlai kan ram dinhmun nena inhmeh thupui tha tak mai kan zir ho tur hi a chakawm tawh takzet a ni. Palaite thinnel tak leh dawhthei taka ro kan rel khan kohhran ropuizia a tichiang hle.

Thupui leh a chhehvel

Ringtu nuna kan hlawh-chham fona 'Isua chhinchhiahna put' tih thupui tum thum ngawt mai Rev. Vanlalzuata awka ngeia kan ngaithla thei kha kan Conference tihlu zualtu a ni. Zoram khawvela Pathian mi hman lar tak thalaiten kan chang

thei kha thil lawmawm tak a ni. Kan tih ve tur erawh chu, khawi kipah pawh awm ila, Lal Isua chhinchhiahna putu nun dan tur ni awm renga mawiin nun kan hmang tur a ni ang.

Programme felfai

Mi tin kan thuhmun vek lo nachungin, kan hruaitute programme ruahman kan tuipui tlang viauvin a hriat. Chanvo neite inbuatsaihna a thain, ninawm lo, up khek khuk si lo, dahlau lutuk baw si lo, thlarau mite pawh zalen taka an chet theihna boruak nen, engkim mai kha a kal mar tha em em vek mai a ni. Tum danga la awm ngai lo, Programme Co-ordinator-te thawh rimna azarah engkim mai kha khaih lak awm lovin a kal mar pat a ni ber e. Anni hian item nei tur apiangte tawng taiin an hlan thlap bakah lawm thu sawina pawh an neihpui leh thin. Hei hian tam tak zamna a tihbo bakah damna chang pawh an awm hial a ni awm e.

Kum dang zawng aiin zai boruak a tha emaw tih tur a ni. Zai hruaitute nikum lam daih a tanga tisa leh thlarauva an inbuatsaihna kha Pathian malsawm chak zawng a ni ngei

ang. A tawp zan Fellowship-a 'A ram leh a felna' tih hla khatiang tak maia nuama kan han sa ho dual dual leh kan lam ho suau suau kha tleirawl zawkte tan tak khan a va nuam dawn em! Inthlah nana duhthusam, chhunzawm zel chi niin a hriat. Khawpui leh thingtlang zaipawl danglamna awm mang miah lo khan Mizote hi zaia rawngbawl zel tur kan nihzia a tichiang hle baw. TV kaltlanga lo thlirtute thinlung tikeh khawpa thalai sing rualin zahpui miah lova Pathian kan fak ho ringawt pawh kha a hlawhtlinna pakhat chu a ni ngei ang. Chutih laiin, zai boruak invawrh that laia hla thlan tur inla lawn tha kan hriat erawh a tul.

Thupui zir inkhawmah 'Duhthlanna' tih thupui hmanga Prof. Lalnundanga thusawi ngaihthlak a khamawm loh hle. Thil chiang tak lo lang chu – thalaiten kan hmalthir eng thilah pawh ngaihtuahna fim tak kan hman hi a tul tawh takzet a ni. Ramthar lam hawi programme-ah 'Chanchin Tha hril tura koh thalaite' tih thupui hmangin Pi Vanlalthawmi, Lecturer, MTC-in thalaite

rawngbawl tura chona thu pawimawh tak min hrilh bawh.

Khual duhawm leh uaptu tha

Ṭum dang ang bawkin khual tha ram pawn leh chung aṭangin kan dawng, hetiangin: Taiwan - 4, SACYN - 1, ECM - 2, MṬKP - 2, LIKBKṬP - 2, NEICCYA - 2, Kristian Khanglai Pawl - 2. Ram pawn mikhualte pheichuan item mit leh beng titlai tak an rawn entir nghe nghe. An zavai hian CKṬP hmingin ngaihruina thilpek hlan vek an ni. Conference chung hian kan Synod Puipaten min uap tha hle bawh. Kan Chief Minister te nupa leh bialtu MLA-te pawhin neitu chan chang takin a tawp min thlenpui a ni. Sawi hmaih hauh loh tur chu – CKṬP hruaitu hlui leh Synod Choir member hlui khati zat maiin kan Conference min la rawn hlutpui kha a lawmawm zual hle.

Sound System

Active Sound te nen kan han thawk ho leh thei kha a lawmawm hle. Anni hi CKṬP programme-ah chuan kan tihbuai thinte an ni. Sound a thain, beng verh deuh, ngaih-

thlak nuam lo a awm lo. Hmasawna chi khat, fellowship laia stage changkang taka lantirtu LED Backdrop kan hmang khan item a tihmuhnawm zual. Ṭum dang ang bawkin thil zuar an tam leh viau mai a, programme ṭan hnuah chuan insiamrem thiam a tha hle. Rilru thianghlim taka hruaitu thar kan thlan chhuahte ṭawngṭaipui thih ila, an mi hruaina zui turin tlawmna puan sinin, mahni theuh i inphah hnuai ang u. Tun ṭum Conference-ah hian Pathian hnathawh a lang nasa em em a, Gas Cylinder hman lai ral thei reng reng lo te, Kudama an thil stock phai thei reng reng lo report kan dawn aṭang ringawt pawh hian Pathian inpuanna a takin kan hmu a ni. Mi tam tak, khawvel thilin a hip bo mek laiin, khati zat thalai rual Isua chhinchhiahna putu, Lalpa fak ning lo kan la awm kha a thlamuanthlak ngawt mai. Kan ram siam tha turin thalaite i ding chhuak ang u. A tawp berah chuan, kum 2020 KṬP General Conference chu Serchhip lamin min sawm ang khan, Pathianin min veng tawn se, inhmuh leh theuh kan tum dawn nia.

LALPA, MIN HRIATPUI TIRAW?

— Rev. T. Lalthantluanga
Sesawng

Aw ka chungah hian zah a ngai lo em ni le? Enga'n ka tawn bik le? Mite chu an bul aṭangin nu leh pa ṭha tak, dinhmun insawh nghet sa, ro sum leh pai, in leh lo ngir khup khawp an pian chhuahpui a. Kei ve hi engah nge ka lo pian chhuah ve reng reng ni aw? Van a duai chuang mang e! Retheihnain bul ka ṭan a, rin tur chuang an awm si lo. He lei hian anchhia min lawh bik em ni? Ke pen a ngil thei lo, beidawnnain min man a, tu ma hriat tham loh, daikil kara mi rethei, mahni pawh inhai vur zo lo ka ni. Hei hi a lo ni maw hring nun chu!" tiin lungchhe vankaiin luaithli ka nul a. Lalpa, min hriatpui tiraw?

Hmangaihna te hi kan sawi ri tak a, mite chu an

kawp lai D nen rûn hmunah lengin hlim zai an vawr a. Fanau maltluan chawiin dam chhung ni hlim ten an chhiar. Vanneihna leh malsawmna an chen a, dam lai pialral chu hei ngei hi a lo ni. Kei ve chu maw vanduaina leh ṭahna hian min riah chillh a. Vai kian ka tum nasat leh thim a chhah a, ka zawh loh leh ka tlin loh thlengin min chim a, min chim pil ri ai ri ai a. Tho leh rual ka ni ta lo. He lungngaihna hmuna ka awm hi, Lalpa, min hriatpui tiraw?

Dam hlutna ka hria a, hmangaihte ṭhen niah chuan khawvel hi ka hmu fiah thiam lo. Mite ngaihah ka lainate hi mi ropui leh hriat reng tlak an ni lo vang. Kei ka tan erawh vanpui a chim a, ka kungpui a tliak a, chhungril na lutuk hian min sawp chau va. Nun reng hi a sawtna hmu thiam lo khawpin chu thihna nunrawng chuan min nghaisa a. Anni ber an awm loh chuan eng nge hlutna ka neih? Ka chhungril tuarna leh rumna hi, Lalpa, min hriatpui tiraw?

Buaina, ṭahna, rumna, beidawnna, natna, hreh-

awmna leh tuarna khawvela kan len lai hian chu nun ngai lova lei piah lam ram thlira kal bo mai duhna ten min ur sa huam huam a, ni eng lo chuaiin thimna zan lung-chhiatthlak in min tuam hlup hlup a. Ding chhuak leh tawh lo tur khawpa rilru beidawng ruma ka awm lai hian, Lalpa, min hriatpui tiraw?

Lungngaih ni leh lawm lai niah hian Lal Isuan min ngaihsak ngai em?

Leiah lungduh ber ka then lain Lal Isuan min ngaihsak ngai em?

Aw! Ani chenpuina leh ngaihsakna tel lo chuan ka kawng a lo thim a, hlauhawm, thawpiknain min chim pil thin.

Heng nun leh hum thim ka tawn tlang lai hian, Lalpa, min hriatpui tiraw?

I tan rinawm taka nun ka duh a, thahnem ka ngai a, taihmak chhuah ka duh a. I hman tlak nih tumin i lam ka hawi a, mahni inhre chang lovin ka hun pum ka hlan che a. Mahse maw, Lalpa, beiseina beidawngin, rinna chak tak mamawhna hmunah rinhlelha thlipuiin min nuai a, ka ke pen a dik lo va, ka lo dai pelh leh mai thin. Thinlung in chhira mittui nen i hnen ka rawn pan a. Sil fai mamawh ka ni tih inhriain i lam ka lo hawi hi, Lalpa, min hriatpui tiraw?

Engkimah min hriat kha Lalpa, ka nun chhungril ber a tanga ka engkimah hian i tel lovin nun ka zuam lo Lalpa.

Hetiang nun hrehawm, thawpikthlak, thahna hmunah hian Lalpa hriatpuina nen tlang sangah lawn chhuak rawh le.



Tawngtaina

Mi ropui : Lalpa, ka harsatna tawh ang tiata lian hian min han siam teh.

Thatchhia : Lalpa, hahdam takin mi'n awmtir phawt mai teh.

Mi lian : Lalpa, harsatna su tlang thei turin chakna min han pe teh.

Mi te : Lalpa, mawhphurhna zang deuh min chantir ang che.

Mi thul tak : Lalpa, ka tih tur ka zawh thleng min awmpui ang che.

Chak lo : Lalpa, ka chau em mai! Ka peih tawh ngang lo a ni.

CKTP 57th General Conference Review

KA CONFERENCE VE A...

— K. Remruatfela
Upper Republic Branch

Kumin KTP General Conference kha ka vawi khat kal vena chauh a ni a. Hun dangah kal chak viau thin mah ila, zirna leh eizawwna hmunin a zir loh avangin KTP member ka nih tir phat atangin hun tha a inher thei ngai lo va. Pathian hruaina leh awmpuina azara kumin CKTP 57th General Conference ka hman ve thei kha ka lawm em em a. A nuam ka tiin a ropui ka ti takzet a. Ka dam chungin ka theihngihl tawh ngai lo vang. He conference chung hian thil tam tak ka zir thar a. Chung ka thil hmuh leh hriat atanga ka vei zawn point 7 rawn chhawp chhuah ve ka tum a. Nakina hruaitu lo la ni zel turte fin chhuahtu a nih ngei pawh ka beisei.

1. Kumin Conference kha March ni 1-4, 2018 chung neih a ni a.

Chuti a nih chuan ni nga leh zan nga a aw h tihna a ni a. Tunlai khawvela mihringte buai tawhzia ngaihtuahin thenkhat tan chuan hun la hek tak chu a ni ang. Tin, inkhawm hrim hrim hi vawi 13 a awm a. A tam mah mah bawkin a lang. KTP General Conference hi rawngbawl na hmanrua ni mah se, kan ni tin eizawwna leh sawrkar leh mipui tana kan rawngbawl na hun la heklutuk zawn ga hman hi chu a fuh ber lem em ni aw, tiin ka ngaihtuah thin a. Kan eizawwna theuhte rinawm leh taima taka kan thawh hian mi dangte tana malsawmna thlentuk kan nih thin avangin, kan eizawwna hna chu a sang emaw, a te emaw, kan zaha, kan ngaihhlut thiam hi a ngai em em a. Chung zawn zawn ngaihtuah chuan KTP General Conference hi Ningani zan atanga tan lo hian, inkhawmpui dang angin Zirtawp zan atangin tan ta zawk ila, tun ai hian kal kan thahnemin sawi sep pawh kan kai lo zawk ang a, tiin ka ngaihtuah thin a. Ngaihtuah zui ngai tak a ni.

2. Sap thufingin, "Hun hi tangka a ni," a lo tih angin hun hi a hlu em em a. A hlawk thei ang bera

kan hman thiam a ngai a ni. Kumin Conference Inkhawm hun kha kan kohhran theuhva inkhawm hunbi kan hman ang zulzuia duan ni mah se, kan kal danah kha chuan dar 5 vel aţangin kan zai ţan a. Dar 7-ah inkhawm ţan niin dar 9:15 bawr velah kan bang tlangpui a. Kan zai ţan aţanga kan inkhawm ban hun rei zawng kha chhutin darkar 4 chuang lai a ni hman a. Inkhawmpui mah ni se, Presbyterian inkhawmah chuan a rei mah mahin a lang.

Tin, zai hruaituten hun an wawng uluk tawk lo va. Inkhawm ţan dar a rik hnuah pawh hla lak nawn an hreh lo va. Hei hian tlemin mit a tikham deuh. Tin, greetings an sawi rei mah mah hlawm a, Secretary pawhin thu a puang chipchiar rei ţhin mah mah a. Thusawitute pawh an inbuat-saih ţha tawk lo nge, duh angin an thusawi a hlawm felfai tawk lo va. Hei hian thui takin inkhawm a tihrei phah ţhin. Kan zai ţan hma chhan ber nia lang chu ţhutna ţha duhtute kan luh hma ţhin vang kha a ni a. Chu chuan kal hma uchuak lamah inelna a siam a. Hei hi thil lawmawm lam niin lang mah se, keimahni kan

intihrehawm phah bakah kan thlen inte phur kan tirit zual mai mai em aw ka ti a. Receptionist-te khan pandal hawn hun kha felfai takin duang se, chumi ang chuan zai ţan chauh ila, kawng kham vanga inkhawm laia chhuak sek te pawh a tikhiam ka ring!

3. Kan inkhawmpui chhung zawngkhan thil zawrh a tam em em a. Chu bakah nepnawi zawrhna dawr a tam em em bawk a. Hei hian ţul lovah sum a la hekin, kan kam a tihhlei phah mai mai niin ka hria. Kan inkhawmpui urhsun hi sum-dawna hunpuiah kan siam ta mai em maw ni le aw, te pawh a tih theih a. Rawngbawlna hmanrua pawh ni se, branch mal sum tuakna kaihnawih thil zawrh tam lutuk kha chuan mit a timim lek lek ţhin. Tin, inkhawm zai ţan hun tawh pawha aurinnaa thil zuar kan la awm ţhin te pawh khan mit a tikham em em a. A bel luih ang zawnga kan thil zawrhte kan inbel ţhin te pawh kha a mawi chiah lo! CKTP kaihnawih thil – Kum puan film, Synod Choir music video, Conference Souvenir zawrh, etc. kha chu a

hriat thiamawm ka ti a. Branch mal sumdawna tam lutuk erawh kha chu chin than loh a tha hlein ka hria.

4. Kumin Conference hla buah khan hla 50 a awm a. Chung zinga hla 10-te chu Kristian Hla Bu chhunga mi, lengkhawm hla thluka kan sak luih luih thin hla vek a ni a. Conference chung pawh khan kan sa ve leh zeuh thin a nih kha! Heng hlate hi hla thu tha tak tak vek a ni a, Pathian pawhin a hmang tih hai rual a ni lo va. Amaherawhchu, Kristian Hla Bu chhunga mi kan seng lut dawn a nih rau rau chuan, thalai rualin a part kima kan sak ho theihna, KHB chhunga hla tha tak tak kan hmaih leh hlawm si kha chu a mak ka ti deuh va. Inkhawmpui lian a nih tak avanga KHB chhunga a part kima kan sak thin hla tha tak takte hnualsuat a ni fo hi chu kan inen let a ngai khawpin ka hria.

5. Thil lawmawm tak chu, kan inkhawmpui chung zawng khan zu rui leh buaina siam ka hmu hauh lo va. Chutih lai erawh chuan, pandal pawn leh a chhehvela mei zu khu hluah hluah erawh hmuh tur a tam hle

a. Thenkhat tan chuan hmuh a nuam lo lek lek mai.

Presbyterian thalaite hian zuk leh hmuam hi sualah kan la ngai hlei thei lo chu ni berin a lang. Rawngbawltu langsar tak takte pawhin insum tumna kan nei chuang lem lovin a lang a. Kan kawngte hi kan chhut ngun viau a ngai tawh a ni. "Nangni in thianghlim tur a ni, kei ka thianghlim si a," tih zirtirna dawngtu vekte kan nih avangin, kan taksa vawn thianghlim kawngah hian tan kan lak lehzual chu a ngai niin a lang.

Presbyterian thalai inkhawmpui liana khati khawpa meizial bung hmuh tur a tam kha chu a lehlam zawng tak chuan a zahthlakin lung a tichhe lek lek thei! Kum puan thupuih pawh khan chhawp chhuah niin a lang a. A tlang ta lo hlah kha a paw ka ti ngei mai. A tlang hun a la awm hram turah ngai ang.

6. KṚP hi kohhran ziarang lanna pakhat kan ni a. Nakin lawka kohhran hruaitu la ni mai turte kan nih avangin KṚP hi chung hun atana kan inzirna pawimawh tak a ni a. Keini member-te pawh hian kan

hruaitute hi kan chhuangin kan zah em em a, kan beisei pawh a sang em em bawk a ni. Chutih lai erawh chuan kan hruaitu, inkhawmpuia chanvo neitute worship service kaihhruai kawngah kan inzir nasa tawh lo lek lekin a lang thin a. Presbyterian Kohran hian ze nghet, ziak loh dan mumal tak kan nei a. Kan kalphungte hi kan chika, kan inzir ngun leh zual a ngai hlein a lang. Urhsunna kawngah te, fekfawna kawngah te leh takna kawngah te tan kan lak thar leh zual a ngai a ni. Worship service chhunga nuihna tur tam lutuk kha, hlimawm viau mah se, a zahawm lo va, kan inkhawm boruak pawh thui tak a tichhe thei!

7. A tawp berah chuan, kan sound system khan duhthu a sam tawh lo va. Kil hrang hrang ri rin dan leh khawh dan a inmil lo va. Hmar lama thute tan sound a rin viau laiin, vei lama thute tan erawh a thawp leh

viau thin si a. A thlengtute inbuatsaihna a that viau laiin sound system erawh kha chuan duh thu a sam tawh lo deuh! Pandal lian inkhawm reng rengah chuan kil tina sound ri hi a rin dan tawh a inang vek tur a ni a. Chutianga sound inchawh tur chuan set theih vek a ni a. Inkhawmpui lianah reng reng chuan sound system hian hmun laili ber a chan thin avangin kan check uluk pawh a ngai em em a ni.

Thil dang tam tak sawi tur la awm mah se, a thui lutuk loh nan duhtawh dawn mai ila. A tawp khar nana ka sawi hmaih theih loh chu – a thlengtute, West Phaileng mipuite inbuatsaihna kha a ropui ka ti takzet a. A khaw chhung leh pandal chhehvel han en reng reng khan an inbuatsaih nasa tih hai rual a ni lo va. An inpekna leh inlung rualna kha fak an phu in an entawn tlak takzet a ni. Lalpan a let tam takin malsawm rawh se.



■ *Thil ropui tih hian sualna pakhat mah a nei lo va, mahni tana thil ropui tih tum tlat erawh chu a pha hauh lo thung.*

- J. Oswald Sanders

Peshawar Tlangval

– Dr. David C. Vanlalfakawma
Committee Member, CKTP

A hming chu Alexander Mehboob a ni a, Pakistan-a rambial pakhat, Khyber Pakhtunkhwa rambial huam chhunga Peshawar-a khawsa a ni. Zirna lamah MA (Islamiyat) leh MA (International relation), M.Div. a ni. A pa chu zirtirtu a ni a, a pu chu Pastor a ni thung. A pamite 2 pawh pastor an ni. A pa pu hi Sikh sakhua aṅanga Kristiana inlet a ni a, chumi achinah chuan an chhungkua hi rawngbawltu chhungkua an ni ta zel a ni.



Tlangval harhvang tak, sa pan thler thlawr a ni a. Ka hmuh hmasak ber nia a chipuite Urdu ṭawnga biala, a tei kual vel ruai kha mitthlaah a la cham reng mai. Kamis ṭial leh kekawrtlawm a ha a, chappal a bun a, a kamis chu a beng lut lo thung. A kamis kar aṅangin a kekawr beng a key chain khai – Pakistan Flag lem chu a lang zauh zauh bawk a, eng thuamhnaw pawh inbel se, he key chain hi a khai reng a, a kawr awmah Pakistan flag anga siam lapel pin a bel reng bawk. A bak hmul a zuah kual a, a hmuihmulin a heh a khuh lek lek a, a ṭawng karlakah a tuai chho leh lawk ṭhin. A hmel en kha chuan, “Khawi lam ringthar nge ni ang le?” tih mai tur khawpa dawldang a ni a, he’ng laia Punjabi kan lo hmuh ṭhinte nen chuan an sa chu in muk hleih tak a ni.

Mahni inuluk tak a ni tih a hriat theih mai. Function pangngai chinah chuan puithiam kawr (clerical shirt) a ha a, pheikhawp pum a bun ap reng bawk. Chutianga a inthum aṅang chuan Pastor a ni tih kan hriat theih phah ta hlauh bawk a. Zan khat chu

Cultural Programme kan hman a, mahni hman inchei dana inchei tur a ni a. Hemi tum hian kan Peshawar tlangval hi kurta var suit hian a rawn inthuan a, chumi chungah chuan kawr-chung dum a la hahram a. Tuifinriat kam tiau phova che velah chuan a la smart ber awm e!

Alexander-a hian St. Albert's College, Karachi atanga BA a zawh hnuin Peshawar University atangin MA a zo leh a, Masters in International Relationship a zo baw. St. Thomas Theological seminary, Karachi atanga M.Div. a zawh hnuah Pastor atana nemngheh a ni a. Kum 2013 atangin Faisalabad Diocese-ah Chaplain niin rawngbawl hna bul a tan a, kum 2017 atangin Peshawar Diocese-a thalai rawngbawl na enkawltuah a tang ta a ni. Pathianniah Pathian biak inkhawm, Urdu leh English Service-in an nei thin a, Zirtawp chhun dar 12-ah Lalpa Zanriah Sakramen an kila, tlai dar 5:30-ah Damna inkhawm an hman zui leh a, eng emaw changin Nilainiah an inkhawm thin baw.

Pakistan rama Kristianna dinhmun

Chanchin thar kan dawn tam zawk hi Pakistan rama Kristiante dinhmun chhiatzia leh an chepzia hlir a ni a. Ringthar thah thu te, biak in suasm tih te hi kan hriat lar a ni. Chanchin thar theh darhtute hian chanchin dik tak emaw, a nihna tak emaw tar lan ai chuan a nih bak hret, mite ngaihven tur zawngin an chhuah thin nia an sawi hi a tak tak emaw tih mai a awl thin. Pakistan-ah hian kum zabi 18 chhovah khan Kristianna hi a lut tawh a; Bristish sipaite leh missionary-ten kohhran an lo din daih tawh a ni.

Pakistan hi Islam dana inkaihhraina ram a nih avangin sakhaw dang tan hmalak erawh a har hle. An ram danah sakhaw danga inleh hi khap bur a ni a, chutih rual chuan sakhaw dang atanga Islam-a an inleh erawh chuan harsatna eng mah an tawng ngai lo thung. Islam sakhaw vuantu Kristianah emaw, sakhaw dangah emaw inpe ta se, sawrkara a inziah luh tirha a inziah luh dan kha Muslim a nih si chuan a sakhua

kha sawrkarin a thlaksak duh ta
thin lo a ni.

Pakistan Kristian Thalaite

Pakistan rama ringtute awka ngei atanga an thalaite dinhmun leh ningkhawng han dawnsawn chu ngaihthlak a nuamin rilru a khawih teh e! Rawngbawl dan chi hrang hrang an nei a, chung zinga danglam tak chu 'Inter-Faith Youth Camp' (Sakhaw hrang hrang thalaite intawh khawm) tih chu a ni. Kar khat chung tehmeuh sakhaw hrang hrang thalaite intawh khawm hun an hmang thin a, chumi chung chuan thil chi hrang hrang an zir ho va, nunphung te, eizawna kawng lam inkawh hmuhna leh inpumkhatna lam thu te an zir ber a, themthiamna kawnga hma an sawn theih dan tur te pawh an zir thin. He programme hi Church of Pakistan buatsaih a ni.

Tunlaina boruak hrang hrangin a chim buai ve reng bawk. Kristian thalai an inhlohna tam ber chu nupui pasal inneih vang niin an sawi. Kristian tlangval tan Islam nula neih chu a theih loh tluk a ni a,

an inneih dawn chuan tlangvalin a sakhua a bansana Islam a zawm emaw a nih loh chuan buaina nasa tak an tawk mai thin. Chutih rual chuan Kristian nula leh Islam tlangval inkarah erawh harsatna a awm lem lo. Nula kha Islam-a a inpek mai avangin! Islam tlangval leh Kristian nula inngaizawng sawi tur an tam a, nulaten an Kristianna an phatsan zel bawk si avangin Kristiante tan chuan channa nasa tak a ni a, Pakistan rama Kristian thalai hruaitute rilru tihatu lian tak a ni.

Ruihhlo avanga harsatna erawh an tawk lem lo. Islam dana rorelna a nih avangin drug leh ruihhlo dang a zalen lo va, thalai zingah ruihhlo ngai an awm meuh lo.

Kristian Thalai nge nge

Eizawna leh hna zawna lamah sakhaw dangte atangin harsatna leh en hranna emaw an tawk ve lem lo. Chuti ahnehin Peshawar leh Hyderabad bawr vela sawrkar leh mi mal hna thawk tura Kristian thalaite an duh ber tlat lawi si chu thil chhinchhiah tlak tak a ni.

“Kristiante chu an taima a, an rinawm a, hna an thiam bawh,” tih hi Pakistan rama ringlomiten Kristiante an hmuh dan a ni. Keini ramah erawh “Kohhrana inhmang lo...” tih te hi hna siamtute tehkhawng a ni lawi a. KṚP-ten inen fiah nan i hmang ang u. Pakistan Kristian ṭhalaite ang hian KṚP-a active takte hi hnathawh tura min duh zawk theih nan theihtawp kan chhuah a ṭul hle mai.

Peshawar tlangval, Rev. Alexander Mehboob-a nen hian SACYN Leaders Training 2017, Negombo-a intawng kan ni a. Hindi-in a ṭawng emaw ka tia, ka Hindi thiam ang angin ka bia a, anin Urdu-in ka bia emaw min lo ti ve thung a! “Urdu i thiam a ni maw?” min ti awl lo va, thui erawh kan inbe thei lem hlei lo va, Hindi thiamin a tlin miau si loh chuan! Sap ṭawng pangngai takin a ṭawng thei a, a awphawi pawh India rama Hindi hmangho awphawi ang tho a nih avangin hriat a harsa lo. Kan cham ho chhung zawnga a ṭawngkam hmasa ber chu, “In chungah thlamuanna awm rawh se,” tih hi a ni. Training-a

tel ve nulahoten fiam tehah an neih a, thla te an lakpui a, an han lem fiam vel ṭhin a. Ani mi kulmuk chi tih takah a hnar nasa thei hle! Chumi hmu chak chuan a aia uar sauhvin an han fiam ta ṭhin a, a ṭang nasa ṭhin khawp mai.

Tlangval hawihhawm leh bengvar tak a ni a, kan haw tur pawh min thlah thlap nghe nghe a. Training chhung zawnga zawhna ngah ber a ni ta hial awm e. Peshawar Diocese ṭhalaite zinga rawngbawltu pawimawh tak, an khaipa – coordinator a ni a. Khyber Pakhtunkhwa Province chhunga Kristian ṭhalaiten kawng hrang hranga hma an sawn theih dan tur ngaihtuahin Peshawar Diocese hian hma an la a, sakhaw dang ṭhalaite nen pawh thawh hona ṭha tak neiin, innghirngho lovin, chak tak siin rawngbawl hna a kalpui mek a ni. SACYN Leaders Training-ah hian Pakistan aṭangin mi 3 an rawn tel a, pakhat chu resource person a ni nghe nghe. Tin, England-a cheng, Pakistan mi, nula pakhat a rawn tel bawh.

RUIH THEIH THIL THAT LOHZIA

– G. Lalnuntluanga
Venglai Branch KTP

Introduction

Khawvela kan cham chhungin hlimna kan zawng thin a, kan thlen chin a tanga a aia sang zawka awm tumin theih tawp kan chhuah thin. Chutianga kan beihna leh kan zawna kawng erawh a inang lo vek awm e. A thente erawh chu kan tum leh kan zawn pawh hre lovin kan tlan chiam mai thei. Kan Pathian thu a kan hmuh angin "Thalaite u in thatlai chen u la, in la naupan lai hian hlim rawh u," tiin. Amaherawhchu, hei hi a tawpna a ni mai lo, kan chung a roreltu a awm a ni tih hre lovin he thu hi kan la wawng ang tih a hlauhawm hle a ni. Thatlai hun lo hi chu nuam chenna hun kan nei lo va, kan hlimna leh lawmna kan neih nasat lai ber pawh kan thatlai hun hi a ni. Damlai pialral tiin R.L Thanmawia pawhin thatlai hun hi a ko reng a ni.

Ruih theih thil chu eng nge?

Mihringte hian kan damloh leh taksa a harsatna, bawrhsawmna kan neih changa kan inenkawl na tur atan damdawi kan mamawh a, kan taksa a lo hrisel

a alo chak theih nan pawh kan ei leh in piah lamah damdawi kan mamawh a, chumitelo chuan kan awm thei tak tak lo. Chu damdawi chu ruih theil thil a ni pah tel baw.

A tel lovin kan awm thei em tiin emaw ruih theih thil hi kan mamawh em tiin inzawt ta theuh i la, 'thei lo' kan ti thei awm e. A chhan chu kan nitin mamawh a nih miao vang a ni. Thenkhatin hlimna kan zawn avanga kan hman sual tak damdawi tha, damna tur an hman sual tak avang hian a lo hnawksak mai zawk. Hetiang ruih nana hman chiah hian mihring tizauthau thei leh tingui thei thil a awm hrang veleh a. Chung chuan mihringah a hnathawh dan erawh a dang ta thin a ni.

Ruih theih thil that lohzia

Damna daw, a chhe zawnga kan hman avang hian thatna lam aiin a chhiatna lam sawi a lo ngai ta hi a lungchhiatthlak hle a, sawi a tul ta pawh hi a pawh hle.

Zahna thlentua ni : Taksa pangngai aia a leta mihring taksa a hna a thawh tawh thinna chuan mi pangngai pawh piangsualah a siam ta a, taksa a nih tur aia a danglam tak avang hian. Mahni mai ni lo a ruka lo tuar ve tu chhungte tan takhian zahna a nasa zawk hial awm e. Mi zingah hawi ngam a ni ta lo a, ruih theih thil vanga chhiatna tawh a nih meuh pheichuan hawi ngaihna a awm

thin lo. Khawtlangin ruih theih thil hi kan do theuh a, ruih theih thila khawtlang hmel a balh phei chuan khawtlang tan a zahthlaka, khawtlang tihmelchhetu a chang mai thin.

Nih tur ang nih tir thei lo tu:

Mi tha tak leh mi zaidam tak pawh a nih tur ang a thlen tir thei thin lo. Zirlai tha tak, thiam thei tak leh chhungte pawhin a ruka an lo inngahna chu a thlen tur ang a thlen tir thei lo a, a nih tur a nih tir thei hek lo. A phu tawk dinhmun aia hniamah a pawthla mai thin. Taksa hrisel tak nei thinin taksa ruangam ni lo a puttir a, taksa en maia chak hmel tak khan nep rukna lian tak a neih tir thin.

Mahni insitna: Mite chuan chutiang khatiang chuan an tiin an awm a, an duh ang an ti a, an chak zawng lah nuam ti takin an ti mai thin tiin mahni theih ve thin chu tithei lovin tih chak siin a awm tir a, mi zingah pawh tlangnel takin a awm tir thei lo va, inthlahrung tak leh inkiltawih takin a awm tir a, kawng engkimah mahni insitna a thlen a, taksa mai ni lovin rilru leh thlarau lam thlengin mahni insitna a thlen mai thin.

Natna: Taksa na chu pawn lam natna a ni a, chhungril (rilru) lam natna neih a nih tawh chuan a lan chhuahna chu taksa pawn lam a ni thin a, a damna tur damdawi a

awm tawh lo. Ruih theih thila natna tawh hian mahni mai piah lamah a tuartu hi midang an lo awm ve thin. Ruih theih thil titu mai chuah ni lovin chhungte leh laina hnaite thleng hian natna a thlen a, a titu atan taksa natna ni mah se chhungte tan erawh rilru natna a ni a, chu rilru natna chuan nghawng tha lo tak tak chhungte chungaha thlena, rilru hreawm takin na ti takin a awm tir ta thin a ni.

Tlangkawmna:

Khawtlang duh loh thil, Kohhran duh loh thil, ram duh loh thil, Chhungkua duh loh thil, he damdawi hman suaana a tanga a tel lova awm theih lohna hian mitin min run a, kan hawina lam apiangah hetiang thil tha lo hi kan hmu tel zel a, kan zingah chengin kan kiangah riahrun a rem ve zel a, mikhual duhawm loh tak chu a va ni em! Duh aain a cham rei ta a, kan hnar haw thei si lo, hnar haw a hnekin kan chelh zawk lawi si. Khual duhawm loh tak a lo thleng a, khual tha chu hnawlin chu khual duhawm loh chu kan lo mikhual thung a. Min chenchilhin kan zingah tlangnel takin a leng a ni ta mai si, a va paw em!

Kan vanglai, kan thatlai hian nuam titakin he khawvel hi kan chen ang a, hlim takin kan nitin nun kan hmang ang a, vanram kan tem lawk ang; a tawpa kan chung a roreltu tur kan hriat reng chuan.

Hruaitute Chanchin

ROCHUNGNUNGA General Secretary



KṚP-in General Secretary kan neih tawhte zinga a naupang pawl, KṚP member rual Pu Rochungnunga hi Pu C. Lalremruata leh Pi Lianthangi-te fa niin, Oct. 28, 1982 khan Serchhipah a piang a. Pa inkhaithli zeh zawih a ni a. Ft. 5 leh inchi 10-a sang, kg. 72-a rit a ni.

'Achunga' tia an koh, a thenin 'Machunga' ti emaw, 'Rova' ti emawa an koh hian Serchhipa Midland School-ah Class VII thleng a zir hnuin, Govt. Higher Secondary School, Serchhipah a kal zui a, Class XII a zo va. Govt. Serchhip College-ah zir zawm lehin B.A. (Hist.) a zo va. Kum 2003 khan Aizawl Theological College-ah B.D. zir turin a tling a, hemi kum October thla aṅang hian ATC-ah BD zirin, kum 2007 khan a zir zo.

Pathian thu a zir zawh hian tun hma aṅanga a lo tuiptui tawh ṭhin, thuziak lamah baw a lut a. Revival Evangelical Weekly

enkawl pahin Vanglaini chanchinbuah a thawk a. High School a kal lai aṅang tawhin chanchinbu tihchhuah hi a tuiptui tawh a, ṭhianhovin chanchinbu an chhuah ṭhin. College a kal lai hian Serchhip tualchhung chanchinbuah a tel reng ṭhin baw.

Revival chanchinbu hi hun rei tak a enkawl a, a chhuah zui tak loh hnuah Vanglaini chanchinbuah ṭhalai huang lam a chang a. Vanglainiah hian hun eng emaw chen a thawh hnuin, kum 2017 October aṅang khan Synod Office-ah Co-ordinator hna thawk ṭanin, Worship Department-ah dah a ni a. February thlaa Synod Executive Committee ṭhu khawm chuan kum 2018-2020 chhunga Central KṚP General Secretary atan a ruat ta a ni.

Tleirawl chhuah aṅanga kohhran leh KṚP bēl nghal deuh chawt a ni a. Serchhip Kawnpui Branch KṚP-ah Branch Committee

member leh zaipawl Assistant Conductor-te a ni tawh a, Serchhip Bial Zaipawl member a ni tawh bawk. A âw a thûma a len that angreng nen hian tenor part a sa tlat thin a, tun hnuah erawh a bass part a sa ve ta. Pathian thu a zir zawha College Veng, Aizawla a awm hnu hian rawngbawlna pawimawh tak tak a chelh a. College Veng Kohhranah Sacrament Dept. Leader a ni tawh a; Branch KṚP-ah Asst. Secretary, Secretary, Treasurer leh Finance Secretary a ni tawh a, Republic Veng Bial KṚP committee member a ni tawh bawk. Kohhranah thuhrlitu leh Puitling Sunday School zirtirtu a ni mek.

Kum 2016 March ni 10 khan an veng, College Veng nula fel Remlalfakinen an inneia, fa erawh an la nei lo. An inneih hnu hian College Veng, Aizawl aṭangin Durtlangah an indang chho zawk a, kumin January thla aṭang khan College Vengah an insawn leh.

Mi huat zawng emaw, ngainat loh zawng emaw a nei hran lo va; ngainat zawng erawh a nei a, mi inngaitlawm leh chapo lote hi a ngainat zawng tak an ni. Mize zawi lam deuh, dam deuh thlup a ni a, titi a ngah vak lo va, a hriat zawng lam sawi erawh chuan

nuam a ti thei hle. Bible châng duh ber a nei lo va, a nun kaihruiatu atana a hman fo leh a hriat chhuah fote chu – Sam 34:10; Thuf. 22:1; Mt. 6:33; 11:28,29-te a ni. Bible bu malah chuan Thuhrlitu leh Chanchin Ṭha Johana ziate a ngaina hle. Hla duh ber a nei lo va, a hun tawn azira Pathianin a pawlna erawh a awm thin.

Ei leh in lamah a khirh lêm lo va, Mizo chaw leh chawhmeh chhawp ang ang chu a ei thei zela, thingpui pawh a dawm ve thei deuh reng a, thlit tawp ila, tihsual a awm lem lo. Infiamna lamah indoor-a khelchhi lam hi a tui pui a, outdoor lama khelchhi chu a ti ngai mang lo. Lehkhabu chhiar hi nuam a tia. Lehkhabu lei hi a nuam tih zawng pakhat a ni a, lehkhabu dawra lehkhabu awm enkual hrim hrim pawh hrehawm a tih loh zawng tak a ni. Thuziak lam hi a tui hle a, Vanglaini chanchinbuah article a ziak fo va, Kristian Ṭhalai chanchinbuah pawh article a ziak tawh thin. Social media lamah erawh chuan Silent Reader nih a duh deuh ber.

Amah i be duh a nih chuan phone number 9862658082 han hmetla, aw lian leh zangkhai, biak lehzel chakawm khawpin a lo chhang vat ang che.

SUNNA**TIMOTHY LALRINDIKA****Pian leh murna**

Pu Timothy Lalrindika hi Pu Lalchhandama leh Pi Vanlalhlui fate zinga upa ber niin 1.1.1990-ah Bairabiah a lo piang a, unau mipa pahnih leh farnu pahnih a nei a ni. Mize zawi leh mi paw i sawi hlau tak, nu leh pate thu awih thei tak a ni.

Kum 2012 khan Cindy Lalrinawmi nen kohhran dan thianghlimin an innei a, tunah hian fa mipa pakhat (Kum 5) leh hmeichhia pakhat (Kum 2) an nei. Kum 2014 April thlaah Kolasib College Venga anmahni inah, a nupui leh a fanaute nen hian an indang ve a ni.

Zirna leh hnathawh

Kum 2006-ah an chhungkuain Kolasib-ah anrawn pem a, kum 2009-ah Kolasib Vengtharah inbengbelin an khawsa zui ta a ni. Amah hi zirna lamah a tluangin a thiam thei hle a, kum 2012 khan

BCA 1st Division-ah a zo va, hemikum vek hian Deputy Commissioner Office-a NIC Section-ah DMA (Data Management Assistant) hna a thawk chhonzawm nghal a. He hna hi a thih ni thlengin a thawk a ni.

A mizia

Amah hi mi invawng tak leh ruih theih thil lam reng reng laka fihlim a ni a. Mi hlim thei tak leh dikna ngaisang mi, hruaitute thu zawm thiam tak a ni a, a kova mawhphurhna tlate thahnemngai taka hlen chhuah tum tlat mi a ni.

Rawngbawlna lam

Kohhranah : Amah hi kohhran bel tlat mi a ni a, a phak ang tawkah kohhran rawngbawl hna a ngai pawimawh em em a, a awmna hmasa Kolasib Vengthar Kohhran-ah Intermediate Dept. zirtirtu, KTP Group Asst. Secy. chanvota chelh hman a, kohhran zaipawlah thahnemngai takin rawng a bawl hman a ni. Kolasib College Veng Kohhrana an pem phei hnu pawhin Pathian leh kohhran a bel chhonzawm zel a; hruaituten a mawhphurhna awm tawka chanvo an pekte tlanche hauh lova a tawp thlenga thawkzel mai thin mi a ni.

Kohhran rawngbawlnaah hian Kohhran Music, Light &

Sound Committee Member a ni mek a. Kohhran inkhawm Sound Operator hna thawkin Kohhran Zaipawlah member a ni a. Sunday School lamah Senior Department zirtirtu a ni mek bawk.

KTP-ah : Kum 2017 khan Kristian Thalai Pawl, College Veng Branch-ah Committee Member a ni a; Group-ah Secretary leh Assistant Leader a ni tawh bawk. Kum 2018 hian Group Leader atan thlan a ni bawk.

Sub-Committee lamah pawh a ñangkaiin, a thiamnate Pathian tana ui hauh lovin a hmang ñhin. Kum 2018 hian Literature & Documentation Sub-Committee-ah Secretary a ni a, KTP chanchinbu PENIEL-ah Editor a ni bawk.

A hun hnuhnung

Ni 3.2.2018 (Inrinni) añangin a khua a sik a, na chhawknate eiin a tuk Pathianniah pawh nuamsam lo chungin Sunday School a kai a. Kohhran inkhawmah Sound Operator a nih thla a nih avangin, chawhnu inkhawm pawh damlo chungin kohhran inkhawmah sound duty hna a la thawk zel a; Pathianni tlai KTP Fellowship chu a hruai a nih avangin, damlo a ni tih pawh hriat hauh lohvin hlim takin a la hruai zel a; zan inkhawmah khawsik sang tak nei

chungin sound duty hna a thawh a nih avangin inkhawm lo mai tura an nun a tih pawhin na chhawknate eiin a rawngbawl hna a la tihlawhtling zel a ni.

A tuk ni 5.2.2018 (Thawhtan-ni)-ah erawh chuan office kal lovin tlai lamah private-in doctor an rawn a, hetah hian Nazareth Hospital, Kolasib-ah an lo admit ta a. A tuk Thawhlejni chawhnu lam añangin a natna chuan zual lam panin, a awm dan apiang chu a ning zung zung a; a BP a hniamin oxygen pek ngai hialin a lo awm ta a. Zan lamah chuan a ziaawm dawn nia a lan laiin, a tuk zing dar 6 vel añangin a dinhmun a hniam thut a; tichuan, tho chhuak leh tawh lovin chawhma dar 10:35-ah chuan ñahnemngai taka a rawng a lo bawlsak ñhin Pathian hnenah min lo hawsan ta a ni.

Hetianga Pathian leh kohhran tana mi inpe, rawngbawlna ngai pawimawh em em kan lo ñhen ta mai hi kan uiiin kan sun takzet a; a kalsan a nupui fanaute Pathianin awmpuiin thlamuan zel se tih hi kan ñawngñaina a ni e.

– T. Lalfakzuala

Secretary

Kristian Thalai Pawl

College Veng Branch, Kolasib



HRINGLANG TLÁNG

Bob-a duhthusam hnuhnung

Mipa naupang pakhat kum 6 mi, Bob-a chu thisen cancer avangin damdawi in a khum pakhatah chau takin a mu bâm a, a nu kum 26 mi chuan a fapa chu hmangaih takin a en ngawih ngawih a; a fapa chu a dam chhuah leh beisei tur chi a ni lo tih Chiang takin a hria. A fapa dam chhuah leh beiseina thuah chuan beidawng tawh mah se, a fapa chu a thih hma ngeia a duh hnuhnung thlantira tihhlawhtlinsak erawh a tum tlat a.

A fapa thih hma ngeia a fapain duhthusam a neih tihpuiltinsak a duh avangin a fapa kut chu a han vuan a, “Bopsy, i len hunah eng nge nih i châk ber le?” tiin a han zawt a. Bob-a chuan inngaihtuah buai miah lo hian, “Ka nu, ka len hunah chuan kâng thelhtu zinga tel ka châk ber,” tiin a lo chhang var a. A nu chuan a tih tur chu a hria. A han nui sak a, “I duhthusam chu ka thlentîr thei emaw i han tum chhin teh ang,” a ti a.

A nu chuan an khua, Phoenix (USA)-a kâng thelhtu pawl pisa a phone a, a fapa Bob-a chanchin leh a natna te, a len huna a duhthusam te chu kim takin kâng thelhtu pawl hotu chu a hrilh vek a. Kâng thelhtu pawl hotu hnenah chuan, “Ka fapa hi a thih hmâ ngeiin a duhthusam hi ataka thlentîr dan a awm ang em?” tiin a zawt a.

Kâng thelhtu pawl hotu Bob-a ve bawk rilru chu mipa naupang Bob-a chanchin chuan a khawih hle mai a, Bob-a duhthusam ang tak chu tihhlawhtlin a tum ta a. Bob-a nu hnenah chuan, “Ka pi, kan theih anga thain Bob-a duhthusam chu thlentîr kan tum ang. I fapa chu Nilaini zing dar 7-ah lo inpeih sela, chumi ni chuan kan zingah nilengin a rawn tel ve ang a, kâng thelhtu tura kan kalna apiangah kan hruai ve dawn nia. Zing dar 7-ah kan rawn lam ang; tichuan, kan zingah tukthuan a kil ve ang a, nilengin kan zingah a chetla ve dawn nia. Kang thelhtu pawl mi ang taka kan cheibawl theih nan i fapa hak tawk kawr leh, kekawr leh a pheikhawk bun tawk number-te min han pe la, engkim kan lo buatsaih dawn nia,” a ti a.

Ni thum hnuah chuan Bob-a chuan damdawi in ațangin mipa naupang Bob-a chu amah ngeiin a han lam a, kâng thelhtu pawl uniform ang takin Bob-a chu a thuan a, a lukumah chuan Phoenix kâng thelhtu pawl chhinchhiahna pawh fiah takin a chuang kalh a. A motor-ah chuan tui khawh chhuahna pipe te, leilawn leh thil dang dang, kâng thelhtu nan hman tur chi a

lo awm ʔup mai a. Bob-a chuan kâng ʔhelh motor chu hmuhdawm ti takin a thlir vang vang a, amah lah kâng ʔhelh pawl ang maiin an thuam famkimin a inthuam bawk nen, a rilru chu hlimnain a khat a. Bob-a chuan mipa naupang Bob-a chu kâng ʔhelh motor-ah chuan a hlang a, kâng ʔhelhtu pawl pisa lamah chuan a phur a. An pisa an thlen chuan kâng ʔhelh pawla thawkte chuan Bob-a chu hlim takin an lo chibai a, Bob-a hlimna chu eng thil nen mah khaikhin chi a ni lo.

Chumi ni chuan kâng ʔhelhtu pawl chu hmun thum laiah kâng ʔhelhin an chhuak a, chutah chuan Bob-a chu a tel ve zel a, nuam a ti em em a. A changin kâng ʔhelh motor-ah a chuang a, a changin damdawi phur motor-ah, a chang leh an hotupa ber motor-ah a chuang a, a changin kâng ʔhelhtu pawlin kâng an ʔhelh lai chu thlalaknain an laktîr bawk a. Chutianga a duhthusama a taka a chan theih avangin doctor-in a dam tur chena an beisei aain thla thum laiin a dam rei phah ta nghe nghe a ni.


Zan khat chu Bob-a chu a chau ta hle mai a, nurse chuan Bob-a chu rei a dam dawn tawh lo tih tlang takin a nu chu a hrihl a, chungkua inko khawm se a ʔhat a rin thu a sawi bawk a. Bob-a nu chuan kâng ʔhelhtu pawl hotu chu Bob-a dînhmun hniam tak thu leh, rei a dam tawh lova a rin thu a sawi bawk a; chuvangin, Bob-a thuih hma ngeiin kâng ʔhelhtuho chu damdawi inah Bob-a hmuh tura lo kal turin a ngen bawk a.

Bob-a chuan, “Ka pi, minute thum chhungin kan lo thleng ang. Thil pakhat erawh min tihsak a ngai dawn a ni. Kâng ʔhelhtute hi an ʔthianpa Bob-a damlo tlawh tura kal an nih avangin, siren ri an hriata mipui an chiaï loh nan eng mah kang a awm loh thu lo puang turin ka duh che a. Tin, a mutna pindan tukverh lo hawng lâwk turin ka duh bawk che a ni,” a ti a.

Rei lo ʔeah chuan siren a rawn ri ruai ruai a, kârlovah damdawi in kawtah chuan kâng ʔhelh motor eng emaw zat chu a rawn inhung ta khup a, kâng ʔhelhtuho chu an rawn zuang thla sup sup a, a bu ang thlapin an che zui nghal sang sang a. Bob-a awmna pindan, chhawng thumnaa dak tawh chiahin an leilawn sang chu an dawh a, chutah chuan kâng ʔhelhtu pawl mi panga an lawn a, Bob-a mutna tukverhah chuan an lawn lut a, an thianpa Bob-a chu an kuah vawng vawng a, chutiang chuan kâng ʔhelhtu pawl mi tin chuan Bob-a chu an kuah vek a.

Bob-a chu thei leh thei lovin a rawn meng ʔawk ʔawk a, kâng ʔhelhtu pawl hotu Bob-a hnenah chuan, “Hotupa, kâng ʔhelh pawl zinga mi ka ni tak tak em?” tiin a han zawt a. Bob-a chuan, “Bobsy, kan zinga mi dik tak i ni asin,” tiin a lo chhang a. Bob-a chu chau hle mah se, a hlim em avangin a nui sak a, chumi tlaiah chuan a thi ta a.

Mi dang hlimna siamsaktute hi mi hlawhtling an ni.



KANTU

Tlangnuam West Br.

Ristian Thalai Pawl, Tlangnuam West Branch hi December ni 15, 2009 khan Tlangnuam Branch aṅanga indang a ni a. Tunah hian kum 9-na a hmang ve mek a, nakkum 2019 hi kum 10 a tlin kum a nih avangin phak ang tawka lawm an tum a ni.

Kum 2018-ah hian member 200 (Mipa 116 leh hmeichhia 84) an ni a, Branch Committee Member hi Kohhran aiawh leh Bialtu Pastor nen 21 an awm. Committee hi thla tin Thawhleh zan hnuhnung berah an thu ṭhin a ni. Missionary pahnih an chawm mek a, an member aṅangin missionary-a chhuak pathum an awm mek a, Kristian Ṭhalai chanchinbu hi copy 42 an la mek bawk. Kum 2018 Branch Project atan Krismas vuak-vetah home eng emaw ber

tlawh an tum a; tin, a theih anga tam biak in ṭhutthleng siamna tur kohhrana pek tum a ni bawk. Kum tinin Branch Kum Puan Thupui an nei ṭhin a, kumin hian 'Taimakna' tih an hmang. Branch sum tuak nan hian Thla Tin Ip, Faith Promise Ip, Blanket suk, Tumkau zawrh te leh inhlawhna awm ang anga inhlawh ṭhin a ni.

Branch hnuaiiah hian Sub-Committee pakua – Finance Sub-Committee, Programme Sub-Committee, Decoration & Ushering Sub-Committee, Refreshment Sub-Committee, Evangelism Sub-Committee, Zaipawl Enkawltute, Lungphum Editorial Board leh Sport Sub-Committee-te an nei a, anni hian chak takin hma an la ṭhin a ni. Kum 2018 hian Group pahnih – Luka Group leh Johana Group-ahte an inṭhen a, Group Budget

atan Rs. 20,000/- tuka ni baw. Biak in hawnga nupui/pasal neite hnenah Lawmpuina Thuziak an pe thin a, missionary-a chhuak tur leh Pro. Pastor-a lakte hnenah present an pe thin. KṚP member boral an awmin ralna hun hman thin a ni a, ralna programme-ah hian Ngaih-hruina Thuziak pek thin a ni. Tin, an boral aṭanga Pathianni hmasa berah fellowship hman thin a ni bawk.

Kum danga an tih thin angin kumin hian Evangelical Sub-Committee-te hmalak-nain Bible chhiar chhuakte hnenah lawmman pek tum a ni a, kum tinin Kohhran Zaipawl hla zir kal tha lawmman pek thin a ni bawk. Thla tin Thawhtan zan inkhawmah member harsatna tawkte pualin tum hnih ṭawngṭai rualna hun an hmang thin.

Inkhawm programme hi an duang uluk hle thin a, Thuhril Inkhawm, Branch Kum Puan Inkhawm, Sawm Khawm Zan, Intuai Thar Zan, Vah Chhuah Zan, Hlim Zan,

Hmanlai Zan, Rilru Sawi Inkhawm titein hun an hmang thin tlangpui. Kohhran Zaipawl hi an chakna bulpui niin, member ṭhahnem takin hla an zirin an rem thei thin a, an member zat ngaihtuaihin inkhawm leh hla zir an tha thin em em a ni. Kohhran Zaipawl hian kohhran inkhawmah thla tin tum khat hla an rem ngei thin.

Central KṚP leh Bial KṚP-ten bawhzui tura an tihte tha takin an tihhlawhtling thei thin a, Pathian hruaina leh awmpuina an dawng nasa em em a ni. Branch naupang te ni chungin Synod Choir (2008-2012) term khan member an lo nei ve tawh. Pathian hruainain Branch chak leh nung tak an ni mek a. Branch chet lakna hrang hrangah, a hlimawm lam emaw, thlan tlaa tha thawh ngai chi emaw pawh ni se, member an thawk chhuak tha thei em em a, an inlungrual hle a, tisa leh thlarau lamah an hlawk thei em em a ni.

Keimahni



■ **UPS LEI THAR** : CKTP Office-a UPS/Inverter hman lai chu a chhiat avangin a thar, UPS 600VA, ~1,850/- man lei a ni.

■ SYNOD O.M. THU

1. Lairam Isua Krista Baptist Kohhran (LIKBK) Assembly vawi 19-na (March 21-25, 2018)-a Mizoram Synod Choir zai tura an sawmna, Synod Officers Meeting-a kan thlen chu OM 3:9 of 25.1.2018 chuan, "Synod Choir term tawp dawn avang leh programme pawimawh dang an neih bawk avangin an kal hi a remchang rih lo ve," tia a rel thu Synod Secretary (Sr.) Upa R. Dengzikpuia hnen aṭangin hriattirna kan dawng (MS/GEN-46/2018/68).
2. Pi Rebecca Lalbiaksangi, CWM Missionary, Wales lehkha – Llanfair Uniting Church Volunteer-a KTP member-te intirh chungchang Synod Officers Meeting-a kan thlen chu, OM 3:10 of 25.1.2018 chuan, "A remchang rih lo ve kan ti," tia a rel thu Synod Secretary (Sr.) Upa R. Dengzikpuia hnen aṭangin hriattirna kan dawng (MS/GEN-46/2018/69).

■ **BRANCH DING THAR REPORT** : Bairabi Bial chhungah January 21, 2018 khan Dinthar Branch din a ni a, member 21, mipa 11 leh hmeichhia 10 an awm. Registration fee ~50 an pe.

■ SYNOD CHOIR RAWNGBAWLNA

1. **SUMSUIH BIAL** : Feb. 3, 2018 khan Sumsuih Bial Conference & Silver Jubilee lawmnaah vawi 2 dinah hla 4 an rem.
2. **SMB MISSIONARY TIRH CHHUAH** : February 4, 2018 khan Synod Mission Board Missionary Tirh Chhuhawh Inkhawm, Chawnpui Kohhran Biak Ina neihah hla 1 an rem.
3. **MISSION VENGTHLANG BRANCH** : February 5, 2018-ah Mission Vengthlang Branch KTP buatsaih Mizoram Synod Choir Night-ah vawi 3 dinah hla 8 an rem. Conduc-

- tor Pu Lallianmawia Tlauvin inhmelhriattirin report a pe a, Director Pu K. Lalruatpuian thuchah a sawi a, Female Voice an zai bawk.
4. **ZEMABAWK BIAK IN** : February 8, 2018 khan CKTP Committee member Dr. David C. Vanlalfakawma nupui neih inkhawm, Zemabawk Kohhran Biak Inah hla 1 an rem.
 5. **REIEK BIAK IN** : February 10, 2018 khan Reiek Kohhran Biak Inah wawi 1 dinah hla 2 an rem a, Conductor Pu Lallianmawia Tlauvin inhmelhriattirin report a pe. He programme hi Reieka video shooting neihnaa ruahman a ni a. Shooting neih zawhah khua a tlai hman tawh avangin shooting tawiawmtu CKTP hruaituten Reiek Kohhran tlawh programme hi hmanhmawh taka an ruahman a ni.
 6. **ELECTRIC VENG BRANCH** : February 12, 2018 khan KTP, Electric Veng Branch Zaipawl Night-ah wawi 3 dinah hla 5 an rem. Conductor Pu Lallianmawia Tlauvin inhmelhriattirin report a pe a, Pu K. Mawizualan Zaipawl testimony a sawi bawk.



Tleirawl

Horace Greeley chu kum li mi a nih laiin an sikula spelling intihsiakah pakhatna a ni a.

Evangeline Booth pawh kha mipui tam tak hmaa sermon a sawi hmasak ber tum chuan kum nga mi chauh a ni.

Hugo Grotius, father of international law an tih kha kum kaw mi a nihin Latin Scholar an ti tawh a; kum 12 a nihin University-ah lehkha a zir tawh a. Kum 15 mi a nihin danhremini hna a thawk a, kum 21 a nih chuan history thiam hmingthang a ni tawh a, khawvel huapa dan thiam (international jurist) a ni tawh bawok.

Mc Cormick pawhin kum 23 mi a nihin buh sengna khawh a hmuchhuak.

Isaac Newton-a chuan kum 24 mi a nih laiin law of gravitation hi a duang chhuak tawh a ni.

Thomas Jefferson-a pawh Declaration of Independence (British lalram atanga America indanna tur thuthlung leh kalphung tur) a duan chhuah lai khan kum 33 mi chauh a la ni bawok.



Kantu – Tianguam West

CENTRAL K.T.P. HRUAITUTE 2018-2020

Office Bearers

Leader	: Rev. Dr. K. Lallawmzuala	9436705777
Asst. Leader	: Upa Rosangliana	9612166769
Gen. Secretary	: Pu Rochungnunga	9862658082
Asst. Secretary	: T.Upa Ricky Lalrammawia Ralte	9862387308
Treasurer	: Dr. Lalrotluanga	9436153937
Finance Secretary	: Pu Lalmuanawma	9436196515

Committee Members

Dr. David C. Vanlalfakawma	9436156561	Tv. Robert Lalduhzuala	9862368012
Tv. C. Malsawmtluanga	9862587200	T.Upa Lalsiammawia Pachuau	9862742440
Pu K. Lalengzama	7308187298	Upa K. Lalnunluanga	8974240614
Pu David Lalhmachhuana	8415926838	Pu R. Lalbiakmawia	9612762602
Pu Rorelkima	9862266440	Tv. Benjamin Lalnunpuia	9862306526
Pu Lalrinchhana Ralte	9774365619	Pu P.C. Lalrinsanga	9436144233
Pu Malsawmtluanga	9612588677	T.Upa Lalrinmawia Ralte	9862359884
Pu Lalruatfela	9436705777	Tv. K. Lalchhanhima	9088933771
Upa Lalmuanpuia	9436142398		

Ex-Officio Members

Rev. F. Lalrinnunga	- Synod Moderator
Upa R. Dengzikpuia	- Synod Secretary (Sr.)
Rev. B. Sangthanga	- Executive Secretary i/c KTP

Postal Regn. no. MZR/81/2018-2020
RNI No. MIZMIZ/2009/29074



General Conference Documentation Team



General Conference zai hruaitute

Printed and Published by Zonunmawia, Synod Office, Mission Veng on behalf of Kristian Thalai Fellowship
Edited by Lalchuanliana and printed at Synod Press, Mission Veng, Aizawl, Mizoram. Copies - 36,000